

四庫全書

史部

欽定四庫全書

弇山堂別集卷六十六

明 王世貞 撰

巡幸考

高皇慎舉動惜煩費自即位後以天下大計嘗一幸汴
梁再幸中都自是深居法宮無都外之蹕文皇定鼎幽
都北巡者三世宗相定顯陵南邁者一然不過傍覽形
勢行游較獵獨武廟輕離六師馳騁八駿不無祈招之

歎焉書巡幸考

洪武元年四月癸亥上以大將軍達等定河南山東有
勸都汴梁者躬往視之是日以宿衛兵十萬發京師五
月癸酉駐蹕邳州庚寅至汴梁辛卯改汴梁為開封府
左右副將軍平章常遇春都督馮宗異師還入謁癸巳
置中書分省于開封六月庚子朔大將軍右丞相徐達
師還入謁壬寅躬祀開封諸神仍遣官分祭境內山川
癸卯大將軍辭行在還次河陰乙丑賜北征諸將夏衣

七月壬申上親畫征進陣圖授大將軍達辛卯上將發
開封大將軍達復自陳橋入辭丙申上發開封命右副
將軍宗異留守閏七月己亥朔遣師犒北征將士丁未
上至自開封八月己巳朔詔以金陵為南京大梁為北
京以春秋往來巡狩八年夏四月辛卯上幸中都鳳陽
府是日發京師抵滁州遣官祭滁陽王廟甲辰駐中都
祭告天地於園丘謂臣每詢儒者言皆曰有天下者非
都中原不能控制臣心不忘洪武初年平定中原臣即

至汴意在建都以安天下及觀生民凋弊轉輸艱難恐
益勞民遂命羣臣會議皆曰濠地古之鍾離於此建都
庶合古今之宜以此兩更郡名今為鳳陽建立都城土
木之役實勞民力功將告成惟上帝后土是鑒乙巳仁
祖淳皇帝忌日上躬詣皇陵致祭是日遣官祭開平忠
武王常遇春祠丙午遣國公李文忠祭外祖楊玉墓辛
亥皇妣淳皇后忌日上躬詣皇陵致祭丁巳還京師詔
罷中都役作自是不復巡幸矣

永樂六年八月丙子朔上以明年春巡狩北京命禮部會公侯伯五府六部都察院翰林院等衙門官會議合行事宜已卯禮部議奏巡狩合行事宜

一詔告天下諸司及各處鎮守總兵官知會

一禮部仍行各處凡有重事并四夷來朝俱達行在所仍具本啟聞其餘事務奏啟俱達京師啟聞施行事有疑礙者在京合該衙門具箋取自上裁

一凡進拜表箋表文達行在所奏文達京師

一禮部預行經過所在軍民衙門俟車駕至官吏生員耆老朝見及預行北京畿內文武衙門令掌印官候車駕至朝見

一祭祀車駕將發奏告天地社稷太廟孝陵祭大江旗纛等神輒祭于承天門其經過處所滁州遣官祭滁陽王泗州遣官祭祖陵鳳陽祭皇陵祭淮關里遣官祭先師孔子望祭泰山緣途古先聖賢忠臣烈士祠墳禮部預期奏聞遣官致祭將至北京境上設壇祭北京山川

等神車駕至北京奏告天地祭告境內山川等神

一扈從在京馬步軍五萬人內馬軍一萬步軍四萬馬
軍五千步軍五千充駕前軍餘馬軍五千步軍三萬五
千分五軍率領每軍馬軍一千步軍七千以都指揮指
揮千百戶管領錦衣衛仍選將軍五百人校尉二千五
百人力士二千人在外馬軍一萬人山東一千四百人
駐兗州府陝西二千五百人駐宿州於不係邊境衛所
選撥遼東四千人駐河間府湖廣一千一百人赴京城

河南一千人駐涿州俱以都指揮一員率領以俟扈從
在外步軍二萬人湖廣武昌衛武昌左衛四千人岳州
沔陽二衛一千人駐鳳陽安陸襄陽蘄州黃州四衛二
千人駐徐州河南南陽陳州信陽三衛一千五百人汝
寧衛一千人駐德州河南弘農二衛一千人駐大名睢
陽歸德寧山三衛千五百人駐定州宣武寧國安吉三
衛四千人太原左右前三衛二千人平陽潞州二衛二
千人駐涿州俱以都指揮領之再侍從五府都督各一

員首領官一員吏六人吏部堂上官一員文選等四司
官五員辦事官二十員歷事監生四十人人材五十人
吏十人戶部堂上官一員北京等十二司官十三員辦
事官十員吏二十四人禮部堂上官二員儀制等四司
官七員辦事官十員吏十二人鑄印局官一員吏一人
匠六人兵部堂上官一員武選等四司官七員辦事官
五員吏十五人刑部堂上官一員浙江等十三司官十
三員辦事官五員吏十二人工部堂上官二員營繕等

四司官十員辦事官二十員吏十五人都察院堂上官
一員浙江等十三道監察御史二十四員辦事官五員
吏二十四人通政司堂上官二員首領官一員吏六人
大理寺堂上官一員左右寺官六員吏十人太常寺堂
上官二員首領官一員吏二人贊禮郎四員協律郎一
員司樂一員樂舞生二十人厨子五十人光祿寺堂上
官三員首領官一員署官十七員辦事官六員吏三人
厨子一千人鴻臚寺堂上官四員首領官一員司賓司

儀二署官各一員序班四十員鳴贊四員及通曉夷語者斟酌帶去翰林院內閣官三員侍講修撰典籍等官六員書制誥秀才八人及譯寫四夷文字監生十三人尚寶司官二員吏科給事中三員戶科給事中三員禮科給事中四員兵科給事中三員刑科給事中三員工科給事中三員中書舍人四員寫誥秀才五行人司行人十員太醫院堂上官二員御醫二員生藥庫官一員醫士摘選三分之二吏三人欽天監官三員天文生

十五人教坊司奉鑾韶舞司樂各一員俳長色長樂工斟酌用之

一扈從文武官軍人等陸路文武官員寫制誥秀才譯字監生緊用供應醫士天文生及厨役人等俱給馬騾馬騾匹官給外脚力驢給鈔六十錠令自備辦事官監生人材吏典及醫士厨役等非緊用者人給脚力鈔二十錠隨伍官員將軍校尉力士旗軍每二人給驢一匹如不敷亦給鈔六十錠自備水路俱應付船隻遇陸路應付車輛

一沿途各站每站增馬二十匹令附近衛所馬軍內差撥仍命附近有司備車一百輛無車之處起夫五百人聽候

一經過處所支給糧草扈從官員人等日給行糧二升馬日給料四升草一束驢料一升草一束

一車駕將發宴在京文武羣臣賜扈從文武官員軍校人等鈔公五十錠侯四十錠伯三十錠一品二品二十錠三品四品十五錠五品十二錠六品七品十錠八品

九品八錠未入流及辦事官將軍總小旗人鈔七錠將
軍各衛總小旗人鈔六錠監生秀才吏典人材醫士樂
舞生軍校力士厨子工匠人鈔五錠軍伴皂隸樂工人
等人鈔四錠在外衛所扈從及各處駐劄官軍依京衛
官軍例給賞

一車駕至北京宴文武羣臣耆老賜官員人等及命婦
鈔其嘗守城婦女論次行賞

一恭遇萬壽聖節公侯駙馬伯文武官四品以上近侍

官及監察御史預宴五品以下并辦事官監生秀才吏典軍民工匠人等依例賜鈔一錠

一五軍六部都察院大理寺錦衣衛各鑄印信通政司鴻臚寺各鑄關防

一扈從官員有牙牌者隨身懸帶以憑關防出入

一經過郡縣分遣廷臣考覈守令賢否即加黜陟分命給事中監察御史存問高年賜幣帛酒肉

一經過鳳陽陵戶及親戚人賜鈔六錠耆老迎見者人

鈔三錠泗州陵戶親戚耆老迎見者賞如之上覽之曰可
七年正月乙亥命禮部遣使于巡狩所經郡縣存問高
年賜八十以上者肉五斤酒三斗九十以上者加帛一
疋二月辛巳以巡狩北京告天地宗廟社稷壬午遣官
祭承天門及旗纛京都諸廟禮典并大江之神車駕發
京師癸未駐蹕滁州遣官祭司馬豐山栢子龍潭滁陽
王泰山池河之神庚子車駕至濟寧州嗣魯王肇輝迎
于道傍周旋進退儀度可觀上嘉之召至行殿賜酒饌錫

賚甚重仍敕山東布政司賜王米一千石三月甲辰朔
駐蹕東平州望祭泰山辛亥駐蹕景州望祭恒山及北京
山川壬戌車駕至北京于奉天殿丹陛設壇告天地
遣官祭北京山川城隍諸神上御奉天殿受朝賀

八年冬十月丁酉車駕發北京先期于奉天殿丹陛設
壇告天地遣官祭告北京山川城隍旗纛諸神其所
經陵寢神祠祭禮如初甲寅車駕次濟寧州魯王肇輝
來朝賜綵幣等物勅戶部加賜米千石丁巳車駕次臨城

時賢妃權氏侍行以疾薨賜祭諡恭獻權厝于嶧縣甲戌
車駕至京師遣官告祭天地太廟社稷孝陵承天門及京
都祀典旗纛諸神上御奉天殿受朝賀大宴文武羣臣
十一年正月壬午上將巡狩北京勅諭天下文武羣臣
凡親王及官吏軍民朝見與道途宿頓供給悉準永樂
七年之令己丑命五軍及錦衣等十二衛各選精銳將
士扈從二月甲子以巡狩北京告天地宗廟社稷辭孝
陵乙丑遣官祭承天門旗纛京都諸廟及大江之神車

駕發京師命禮科給事中監察御史所過存問高年賜帛及酒肉辛未車駕至鳳陽祀皇陵賜耆民年八十以上者人酒三斗肉五斤九十以上者加帛一疋三月乙酉車駕次濟寧魯王肇輝來朝賜鈔幣并米一千石夏四月己酉車駕至北京上于奉天殿丹陛設壇告天地遣官祭北京山川城隍諸神遂御奉天殿受朝賀

宣德三年秋七月壬辰上御奉天門召公侯伯五府都督面諭曰邊境每歲秋高必騷擾比來邊備不審何似

東北諸關隘皆在畿內今農務將畢朕欲因田獵親歷諸關警飭兵備卿等整齊士馬以俟丁酉太師英國公張輔上扈從士馬之數命行在戶部每卒給一月行糧加麥三斗為乾餼行在工部給胖襖褲鞋戊戌命行在兵部太僕寺選民間所畜官馬給騎卒壬寅命行在兵部凡扈從文武官及將軍悉準永樂中例給脚力馬驢及其僮從悉給行糧勅通州三河薊州遵化軍衛有司諭以將親巡邊毋科擾軍民以為進獻道路可通行足

矣母勞民修治勅都督陳景先修灤河橋癸卯命少師
蹇義少傅楊士奇少保夏原吉太子少傅楊榮禮部尚
書胡濙兵部左侍郎王驥刑部左侍郎施禮工部尚書
吳中僉都御史凌晏如太常卿蕪學士楊溥太常卿姚
友直大理少卿王闕貴等各率其屬扈從仍諭諸將師
行須嚴紀律申號令盔甲必鮮明兵器必鋒利軍容必
整肅毋縱士卒擾百姓丙午告太廟丁未發京師九月
車駕入薊州境駐蹕州西之五里橋州文武官吏耆老

朝見諭州官以漢漁陽太守張堪為政諭耆老訓勵子
孫務禮義廉恥辛亥至石門驛喜峯口遂親征烏梁海
以下見親征

正德十二年五月癸未上微行至石經山湯峪山玉泉
亭數日乃還石經山寺朱寧所營建也窮極壯麗乃邀
上幸焉八月甲辰朔上微服從德勝門出幸昌平外廷
猶無知者辛未上度居庸關遂幸宣府令太監谷大用
守關無縱出者九月甲戌朔上駐蹕宣府江彬宣府人

欲挾上自恣始誘為西北之行既幸宣府遂營建鎮國
府第時時夜出見高門大戶即馳入或索其婦女於是
富民厚賂彬以求免久之軍士樵蘇不繼至燬民屋廬
以供爨市肆蕭然白晝戶閉十一月戊子上還至宣府
十二月內閣大臣及九卿至居庸關請駕有禁不得出
關而還又十二月壬申朔上留宣府大學士楊廷和等
以次出視郊祀牲如常儀有旨戒諭京城九門守門官
勿放朝官出城丁亥立春上迎春于宣府備諸戲劇又

飭大車數十輛令僧與婦女數百共載婦女各執圓毬車既馳交擊僧頭或相觸而墮上視之大笑以為樂是日順天府官于奉天門進春如常之儀

十三年正月庚戌大祀天地于南郊祀畢上復幸南海子辛亥上自南海子還宮出御奉天殿文武羣臣行慶成禮以所獵獐鹿賜文武大臣及科道官辛酉上復如宣府二月庚午朔上在宣府己卯慈聖康壽太皇太后崩越三日壬午上至自宣府乃發喪六月庚辰孝貞太皇太后梓宮發

引先期結平臺與順天府交衢相值上晨出北安門迎
皇太后及皇后御平臺候殯復入至清寧宮率番僧梵
咒乃發引遂親奉梓宮朝祖百官衰經徒步送至德勝
門外其送葬官騎送沿途皇親羣臣命婦各祭如儀祭
時上戎服馳馬過顧侍郎馬逸為邏卒所獲牽至上前
遂乘之是夜宿清河癸未梓宮至山陵獻殿行安神禮
遣工部尚書李鐸祭告后土并天壽山之神遣駙馬都
尉崔元林岳馬誠分告長陵獻陵景陵裕陵茂陵泰陵

上忽馳馬至山下陪祭官皆驚散上飲于帳殿遂宿焉
七月己亥太監蕭敬傳旨近年以來敵數入邊屢害地
方且承平日久誠恐地方兵戎廢弛其遼東宣府大同
延綏陝西寧夏甘肅尤為要甚今特命總督軍務威武
大將軍總兵官朱壽統率六軍隨布人馬或攻或守即
寫各地方制敕與之使其必掃邊塵靖安民物至于河
南山東山西南北直隸倘有小寇亦各給與勅書使率
各路人馬剪削朱壽者上別名也是日復召內閣大臣

及九卿科道官至左順門諭意衆皆泣諫不納丙午上復北幸黎明由東安門出羣臣知而送者五十二人丁未上度居庸關歷懷來保安諸城堡遂駐蹕宣府初江彬勸上於宣府治行宮越歲乃成糜費不可勝計復輦豹房所貯諸珍玩及巡遊所收婦女實其中上甚樂焉每稱曰家裏還京後數數念之不置彬亦欲專寵俾諸幸臣不得近數導上遠出及再度居庸仍戒守者毋令京朝人來往蓋上厭大內初以豹房為家至是更以宣

府為家矣八月戊辰朔上在宣府乙酉上自萬全左衛
歷天城陽和至大同九月戊戌朔駐蹕大同先是鎮守
太監馬錫以總兵葉椿第為獻遂為總督府居焉又奪
都指揮關山指揮楊俊宅置店二所改為酒肆榜曰官
食庚子上至偏頭關時車駕至貴近多先掠良家子女
以充幸御至數十車在道日有死者左右不敢聞十月
戊辰上渡黃河己卯駐蹕榆林十一月上至綏德州幸
總兵官戴欽第尋納欽女戊寅上自榆林歷米脂綏德

渡河幸山西石州文水諸州縣十二月戊子駐蹕太原
先是幸偏頭關取太原晉府樂工楊騰妻劉良女嬖之
及是復召見大得幸十四年春正月戊辰發太原壬子
至宣府往返數千里皆輕騎戎裝冒風雪以行有司具
輦却弗御二月壬申還京師文武羣臣具綵帳銀幣羊
酒迎于德勝門外如先年儀十四年正月己丑上手勅
禮部總督軍務威武大將軍太師鎮國公朱壽今往南
北兩直隸山東泰安州等處尊奉聖像祈福安民內閣

府部大臣及科道部屬等官各具疏懇諫上不納七月
甲辰寧王宸濠反書聞詔討之

詳見
親征

八月癸未上發京

師丁亥至涿州留太監張忠私第九月壬辰朔駐蹕保
定府張宴後堂與巡撫都御史伍符藏鬪醉之酒以為
樂癸巳發保定戊戌至臨清山東鎮巡官皆從越三日
傳令進宴宴具草畧上視之笑曰慢我何甚竟不怒及
宴都御史王珣獻觴步緩上目之神周因怵珣謂上意
不測明日復宴都御史龔弘趨進自言姓名恐上誤以

為珣也江彬從傍厲聲叱之冀并罪兩人上不為動時
太監黎鑑家人有以科斂得罪者鑑盡出所有以獻復
取償于有司珣不可鑑以頭觸之遂相忿爭鑑泣訴于
上上曰此必汝有求不遂耳巡撫何敢辱汝也鑑語塞
而退癸丑上自臨清北還初上之南征也與劉氏有約
劉贈以一簪且以為信過廬溝馳馬失之大索數日不
得至臨清使使召劉劉以無信辭上乃乘單舸晨夜疾
歸至張家灣與劉俱載而南道遇湖廣叅議林文纘入

其舟奪其妾乃行乙卯過州十月壬午發臨清十一月
辛卯發濟寧丙申至徐州辛丑御龍舟乙巳至淮安清
江浦幸太監張陽第集漁人捕魚為樂時提督叅畫平
戎伯朱彬尤橫縱旗牌官考縛郡縣長吏通判胡琮懼
而自縊南京守備成國公朱輔見即長跪總兵鎮遠侯
顧士隆稍不為屈即窘辱之又遣官校四出矯上旨索
民家鷹犬珍寶古器無得免者壬子上在清江浦羣臣
于張陽第稱賀甲寅上至淮安却侍衛步入城幸總兵

顧士隆第丁巳羈管掌錦衣衛左都督朱寧于臨清已
未至寶應縣漁汜光湖十二月辛酉朔至揚州府太監
吳經前選民居壯麗者為總督府矯上旨刷處女寡婦
因取其金無金者悉送入府壬戌上以數騎獵城西遂
幸上方寺命總兵神周搜括泰州鷹犬辛未傳旨正月
於南京郊祀天地大學士梁儲蔣冕力諫而止戊寅大
閱諸妓女於揚州撫按官具宴却之命折價以進癸未
漁於儀真之新閘因視大江命江彬攝祭明日幸民黃

昌家閱太監張雄守備馬昊所選妓以其半送舟中乙酉渡江丙戌至南京丁亥祭南京太廟十五年春正月庚寅朔謁孝陵丁酉上迎春于南京備諸劇戲如宣府戊午傳旨執太監畢真劉瑯劉璟都指揮廖鵬齊佐王準都督同知王獻等下錦衣獄坐通謀宸濠及朱寧黨也六月丁巳朔後數日幸牛首山宿焉諸軍夜驚左右皆不知上所在大擾久之乃定閏八月壬辰上詣孝陵辭癸巳受江西俘丁酉旋蹕發龍江辛丑至儀真壬寅

漁于江口次日如瓜洲避雨民家夕宿望江樓癸卯自
瓜洲濟江登金山遂如鎮江幸致仕大學士楊一清第
明日復幸馬入書室取冊府元龜文獻通考以進又明
日飲于其第樂作分題製詩十章賜一清命和進為易
數字一清厚有所獻上大悅及駕還凡五幸焉又幸故
大學士靳貴第時樞在堂上臨撫嗟悼之命所從番僧
為誦經薦福庚戌發鎮江壬子復宿望江樓癸丑上至
揚州仍寓總督府丁巳撫按等官設宴慶功用金銀牌

各二軸一旄帳綵帛若干足其餘折價以進戊午發揚
州庚申上至寶應復漁于汜光湖鎮守太監丘得索貢
物不得以鐵索繫知府蔣瑤辛酉駐蹕淮安都御史叢
蘭總兵官顧士隆等進賀功金牌花紅綵帳上戎服簪
花鼓吹入城過山陽縣學入取學官通鑑諸書而出遂
宿故尚書金濂第丙寅至清江浦復幸太監張陽第踰
三日上自汎小舟漁于積水池舟覆溺焉左右掖之而
出自是遂不豫十月庚寅至天津庚戌至通州十一月

庚申執吏部尚書陸完至行在是日復執太監商忠杜
裕少監盧明泰用趙秀錦衣衛都指揮薛璽陳嘉御史
張鰲山布政使林正茂等下錦衣獄令司禮太監蕭敬李
英間住皆以與宸濠交通也丁丑傳旨擇日詔告仍命
六部都察院通政司大理寺鴻臚寺錦衣衛六科十三
道每衙門止留佐貳官一員在其餘并內閣皇親公侯
駙馬伯俱赴行在十二月己丑提督贊畫機密軍務兼
提督官校辦事後軍都督府平戎伯朱彬奏奉總督軍

務威武大將軍總兵官掌後軍都督府太師鎮國公朱
壽指示方略擒獲宸濠逆黨乞明正其罪奉旨褒諭賞
廕是日賜宸濠死甲午上還京文武百官迎于正陽橋
南是日大耀軍容俘諸從逆者及家屬數千人陳輦道
東西上戎服乘馬立正陽門外閱視良久乃入以親征
凱旋遣官祭告天地宗廟社稷

嘉靖十八年二月丙申勅諭禮部皇考顯陵昔者建造
狹隘雖嘗增修猶多未稱茲朕躬詣陵下與左右大臣

周閱山川更卜吉兆重建玄宮以安皇考皇妣神靈于
無窮朕親擇于二月十五日于丑時發京前期五日朕
親奏告皇天於玄極寶殿及太祖睿宗廟分遣大臣祭
告北郊成祖六宗太社稷帝社稷朝夕等四壇所有合
行事宜爾部臣會同在廷羣臣詳議即便開具奏聞處
分己亥兵部尚書張瓚等條上扈從事宜

一選錦衣衛官一百二十員旗校八千人沿途應用外
仍給旗校馬三千匹官軍自行糧外先加賞賚有差

一駕所駐蹕之地分巡兵備等官親督官軍朝夕巡視
一輿駕經行之處無論大小牌坊悉行拆撤

一沿途行宮之側蓋廠舍十餘間安設輿輦駕儀仗及
官校直宿

一扈從人員所用馬匹先令太僕寺少卿三員分程催
調每處調六千餘匹委二司官領

一每府州縣借支官銀募夫一萬餘名以應扈從官員
之用

一每處用車四百餘輛俱以官銀顧募

一自京師至涿州人夫車輛取兵部協濟銀顧募馬匹
暫借團營騎操馬四千五百匹應用

一各省預安二司三員一理人夫一理軍馬一理廩給
怠緩悞事者聽科道叅劾報可

禮部上南狩注前期五日上親奏告皇天於玄極寶殿
畢同日告聞皇祖太廟皇考睿宗廟欽命大臣一十八
員分告北郊德祖懿祖熙祖仁祖成祖列聖羣廟太社

稷帝社稷朝日夕月天地神祇行事俱用祭服太常寺
備辦合用脯醢酒果制帛翰林院撰各項告祭文較祭
于承天門遣官祭旗纛之神俱用牲醴制帛三獻如常
儀至期駕發由正陽中門出后妃輦轎後隨出宣武門
錦衣衛恭設欽製武陳駕備輦輿儀仗等項扈行仍選
用官員將軍校尉力士人役數目該衛奏請定奪簡命
武職重臣二員留守京師兵部尚書一員叅贊機務簡
命文職大臣二員一總督整飭宣大等處軍務一提督

薊州山海關等處地方邊備各請勅行兵部奏請皇城
四門京城九門大明門外合用守門文武大臣各一員
坐營官侯伯二員守門官軍用科道點閱扈駕官軍兵
部於團營揀選六千餘名給兌馬匹令聽征總兵叅將
各二員統領扈從仍聽左右副將軍節制兵部移文沿
途撫按各官聽撥屯駐及扈駕車馬戶部定擬扈從官
軍各項人役行糧奏請關給仍請勅命戶部侍郎一員
率屬官六員帶領太倉銀三十萬兩先期前去沿途整

理糧料聖駕所經由處凡橋梁道路行宮簾殿工部行文原奉敕郎中同內官監欽遵督理禮部行南北直隸浙江等十三布政司有緊重要事俱達行在所奏聞其餘事務俱達在京通政司每月差人赴行在類奏其各該衙門事有疑礙者各差人赴行在具奏取旨施行各處拜進表箋文除歲例等項赴在京禮部照常數收差人赴行在具奏其特賀大禮不係常典者原差人恭詣行在投進光祿寺隨路備御膳酒飯供具扈從官勲臣

一員駙馬都尉一員輔臣一員五府堂官各一員吏部
刑部各堂官一員戶部禮部工部堂官二員吏部戶部
刑部每司各官一員禮部兵部每四司官十員都察院
堂官二員大理寺官五員首領官二員屬官十員光祿
寺堂官二員署官四員太僕寺堂官一員首領官一員
鴻臚寺堂官俱從司賓司儀各一員鳴贊四員序班十
六員通事四員翰林院講讀修撰等官三員內閣制勅
二房官共二十員譯字官生四人尚寶司官四員六科

給事中十二員中書舍人一員行人司行人五員太醫院堂官五員御醫吏目八員聖濟殿醫士選帶三分之一吏二人欽天監堂官一員博士等官八員天文生陰陽生共十人吏一人教坊司奉鑾韶舞司樂八員俳色長樂工二百人扈從文武內外官及各項役合用夫馬車輛廩給口糧各項應付事宜兵部定擬奏請轉行在外有司一體應付其扈從官員於尚寶司給領文武字面牙牌內府印綬監給領關防印信在途供事以便應

用朝叅用吉服經過處所真定望祭北岳恒山滎澤祭
河神南陽遣官祭武當山之神沿途古帝王聖賢忠臣
烈士祠墓禮部查訪預期奏聞遣官致祭岳瀆太牢次
用少牢又次脯醢酒果各處撫按并三司官俱于所屬
境上候駕先赴鴻臚寺報名駕至行殿各具吉服朝見
府衛州縣官吏生員耆老人等俱于三十里外候迎道
傍跪叩頭駕過退駕至行殿鴻臚寺引見行五拜三叩
頭禮每日早晚從官朝奏事如常儀鴻臚寺引地方及

公差有事官員師生耆老人等朝見者如前儀路近王府封疆者則王具朝服率宗室預出城候駕過跪迎道傍叩頭駕過興駕至行殿王朝見行五拜三叩頭禮禮畢上賜宴勞光祿寺給之駕至豐驛太常寺奏致齋三日欽定三月初七日駕入承天府於舊邸承運殿陞上行拜天禮前期該寺陳設脯醢酒果香帛駕至內贊奏就位如告祭儀禮畢上御殿從駕百官偕地方鎮巡司府州衛大小官員具吉服先行四拜禮鴻臚寺官具班

首官名致詞畢復行四拜禮合境耆老生員人等隨班
行禮畢駕還宮十九日叅謁顯陵太常寺陳設牲犢制
帛質明上具祭服太常寺官導引由陵左門入殿左門
內贊奏就位奏上香奏四拜行初獻禮請祝行亞獻禮
奏四拜焚祝帛禮畢從駕百官及撫按司府等官俱祭
服陪拜是日祭純德山之神太常寺備牲犢制帛如告
儀百官俱陪拜疏上詔俱如擬尋復面諭尚書嵩發京
更二月十六日寅時前所上諸儀有當增定更正者嵩

退乃疏言駕至承天一應禮儀俟至彼另具謹先遵諭
發京沿途諸儀增正具聞十一日辰時上親奏告皇天
於玄極寶殿畢同日告聞皇祖太廟皇考睿宗廟遣大
臣十八員分告北郊德祖懿祖熙祖仁祖成祖列聖羣
廟太社稷帝社稷朝日夕月天地神祇行事俱用祭服
太常寺備辦合用脯醢酒果制帛翰林院撰各項祭文
輒祭于承天門遣官祭旗纛之神俱用牲醴制帛三獻
如常儀駕發由正陽中門出后妃輦轎後隨錦衣衛恭

設欽製武陳駕備輦輿儀仗等項扈行本衛揀選精壯
旗校八千人內以六千人專管擡捧上坐輿輦以二千
人專管擺執駕儀及一應工直巡綽傳宣等用選委千
百戶一百二十員分頭管理各分撥班次更番接替仍
行太僕寺調取寄養馬三千匹兌給各旗校令其更迭
騎坐以紓困乏錦衣衛前驅使率領本衛千百戶等官
先期前去肅清道路簡命武職重臣二員留守北京兵
部尚書一員叅贊機務各請勅行事簡命文職大臣一

員總理整飭宣大等處軍務提督薊州山海關等處地方邊備各請勅行事欽命文職重臣一員往遼東薊州宣大雁門固原等九邊閱視邊備戶部齎銀若干隨帶前去勞賞官軍請勅行事兵部奏請皇城四門京城九門大明門外兩邊各用守門文武大臣各一員坐營官侯伯二員增設守門官軍用科道官點閱京城內外巡捕官軍除舊有外合行團營再選有馬官軍三千員名分為兩班酌派五城地方與同舊有官軍巡邏仍選委

坐營官及各提督把總等官晝夜巡捕安定門各土城外及鄭材壩大黃莊居庸關白羊口六處地方該營揀選有馬官軍每處一千員名分為兩班輪流下營防守安定德勝門土城外各用東西官廳聽征總兵官一員其餘各用叅將一員統領下營紫荆倒馬二關保定撫鎮官揀選精銳有馬官軍每關一千員名分為兩班每月一換輪流下營守把各委坐營官一員統領一員扈駕官軍兵部于團營東西官廳御馬監勇士內揀六千

員名給兌馬匹執武陳駕儀一千人總兵官一員領之
駕前後各二千人叅將二員領之駕左右各五百人翼
駕行左右副將軍領之兵部行文沿途撫按官調撥屯
駐及扈駕軍馬戶部定擬扈從官軍各項人役行糧奏
請關給請勅命戶部侍郎一員率屬官六員帶領太倉
銀三十萬餘兩先期前去沿途整理糧草料沿途修理
橋道及搭蓋行宮蒔殿工部行文原奉勅郎中同內官
監欽遵督理禮部行南北直隸浙江等十三布政司凡有

緊要重事俱達行在所奏聞其餘事務俱達在京通政
司照常封進各該衙門啟請皇太子令旨行其事有疑
礙者各差人赴行在具奏取旨各處拜進表箋文除歲
例等項赴在京禮部照常數收啟請司禮監官捧進其
特賀大禮不係常典者原差人恭詣行在投進光祿寺
隨路預備御膳酒飯供具扈從官五府堂上官各一員
首領官五員吏五人吏部堂上官一員文選等四司官
四員辦事官六員吏六人戶部堂上官二員浙江等十

三司官十三員辦事官二員吏十三人禮部堂上官二員儀制等四司官六員鑄印局官一員辦事官六員儒士三人吏十二人鑄印局匠四人兵部堂上官一員武選等四司官六員辦事官一員吏六人刑部堂上官一員浙江等十三司官十三員辦事官一員吏十三人工部堂上官二員營繕等四司官十員辦事官二員吏十人都察院堂上官三員浙江等十三道監察御史二十六員辦事官四員吏十三人通政司堂上官二員首領

官一員辦事官二員吏二人大理寺堂上官一員左右
寺官二員辦事官二員吏二人太常寺堂上官六員首
領官二員屬官十員吏二人執事人役四十名厨役三
十人光祿寺堂上官一員四署官四員吏四人厨役二
百人太僕寺堂上官一員首領官一員吏一人鴻臚寺
堂上官俱從司賓司儀各一員鳴贊四員序班十六員
通事四員翰林院講讀修撰等官三員內閣制勅誥勅
二房官共二十員譯字官生四人吏十人尚寶司官四

員吏一人六科給事中十二員吏六人中書舍人一員
吏一人行人司行人十員吏三人太醫院堂上官五員
御醫吏目八員聖濟殿醫士選帶三分之一吏二人欽
天監堂上官一員博士等官八員天文陰陽生共十人
吏一人教坊司奉鑾韶舞司樂八員俳色長樂工二百
人扈從文武內外官各項人役合用夫馬驢騾車輛廩
給糧各項應付事宜兵部定擬奏請轉行在外有司一
體應付扈從文武衙門官員先年內府印綬監收貯行

在衙門印信關防本部領出給付各官使用扈從官員
於尚寶司給領文武字面牙牌駕發留守大臣率在京
文武衙門官員各具吉服先恭赴宣武門外彰義門候
送駕駕過退各衙門扈從官員分程先行在途俱免朝
恭候駕禮兵二部鴻臚寺太常寺光祿寺官科道糾儀
官俱從行凡遇行宮進宮進膳處所各該撫按守巡兵
備等官選委精壯官軍披帶盔甲器械拱衛乘輿不許
喧譁錯亂違者聽錦衣衛官即時具奏拏問扈駕官軍

戶部給散行糧工部辦鍋竈不許分外索害有司及入民舍混擾違者許被害之人赴撫按衙門告治仍行隨駕緝事官校訪拿重治諸凡供應俱有奏請定議各該軍衛有司不許分外科取斂民違者聽撫按官體訪指實叅究重治各衙門跟隨吏書各照兵部原行關文於軍衛有司驛遞衙門應付不許分外多索其應付衙門亦要即時應付毋得遲誤違者俱聽所在官司告治經過駐劄地方原有商賈店鋪開賣即飲食等物照常市

質不許躲避亦不許從駕人員用強輕價勒買違者許
被害之人即時告治兵部咨行各該巡撫官預先出給
榜文曉諭經過處所真定望祭北嶽恒山之神衛輝遣
官祭濟瀆之神鈞州望祭中嶽嵩山之神滎澤祭河神
南陽遣官祭武當山之神沿途古帝王聖賢忠臣烈士
祠墓禮部查訪預期奏聞遣官致祭岳瀆用太牢次用
少牢又次脯醢酒果各處撫按并三司官俱于所屬境
上候駕先赴鴻臚寺報名駕至行殿各具吉服見所過

府衛州縣官吏生員耆老人等俱于三十里外候迎道
傍跪叩頭駕過退駕至行殿鴻臚寺引見俱行五拜三叩
頭禮各處近路王府許親王具常服預先出城候駕至
跪迎道傍叩頭駕過興駕至行殿王具朝服見行五拜
三叩頭禮畢上賜宴勞光祿寺備宴席給領其餘宗室
俱免出迎不許擅離府第得旨祧廟不告百官迎送但
立而已親王尤不可伏謁道左從官不得需索有司不
得媚奉違者嚴衛科道察舉以聞二月庚子朔冊立皇

太子封裕王景王丁未命咸寧侯仇鸞掛左副將軍印
東寧伯焦棟掛右副將軍印扈駕尋詔左右將軍翼行
叅將二人為前鋒後衛以翊國公郭勛掌中軍成國公
朱希忠副之仍給勛希忠旗牌各六面尋以內府所貯
行在印信關防給扈從官員無者鑄給選團營官軍六
千人扈駕乙卯駕發京丙辰以失候迎命錦衣衛捕治
順天府治中潘璐章駕至真定望于北岳壬戌定諸王
朝見儀凡親王迎接去處公郭勛朱希忠侯崔元輔臣

夏言禮卿嚴嵩夏卿王廷相左右從行并上朝見處殿
門侍班諸王迎接已命文武大臣侍于途王于道傍立
文武大臣下馬侍上左右禮部尚書跪奏王某王某恭
迎聖駕見內侍官引王至駕前跪行叩頭禮禮部尚書
進立于上前候旨承旨訖起立傳旨侍王隨行至行宮
上入少憩王具冕服欽定文武大臣於殿內左右侍從從官
于丹墀東西侍班候上陞座鴻臚寺官引王于殿左門
入至拜位贊行五拜三叩頭禮畢內侍官引王于別次


少候從官叩頭如常儀鴻臚寺卿跪奏禮畢癸丑至趙
州執宮外稱寃者以錦衣衛官陳寅等不在切責之乙
丑趙州臨洛鎮二處行宮駕發後火逮治所司至磁州
趙王厚煜道迎入朝行殿降旨勞慰賜宴遣公溶尚書
嵩送還國賜書褒獎及金幣歲增祿三百石丁卯至衛
輝汝王祐棹郊迎入朝行殿賜宴餘禮如趙王加歲祿
五百石夜四更行宮火內侍有殞者法物寶玉多燬戊
辰至新鄭鄭王厚烷郊迎朝行殿慰勞賜宴如儀歲加

祿三百石勅錦衣衛將衛輝知府王聘知縣侯郡等俱
逮送都護軍門御押前導示衆逮兵部侍郎張衍慶巡
撫都御史易瓚巡按御史馮震二司掌印守巡官下錦
衣獄三月己亥朔渡黃河庚午至鄭州周世孫朝垵來
迎朝行殿慰勞賜宴加祿如儀以諸王所獻馬匹金幣
頒賜扈從大臣公勛等有差辛未至鈞州徽王厚燾迎
宴勞獎賜加祿如儀致仕大學士賈詠自臨潁來迎失
朝奪少保太子太保乙亥唐王宇溫迎慰勞賜宴加祿

如儀丙午以推用忤旨罰吏部尚書許讚俸三月郎中
半年先是伊王訐淳失郊迎及朝見下禮部議特旨宥
之戊寅至承天庚辰舍舊邸慶雲宮謁皇考主于隆慶
殿謁一顯陵駕至純德山及紅門降輦稽首遂騎登陵
山立表于皇考陵寢之北命改營焉製初謁純德山喜
而自得之詩以誤送親王降尚書李廷相侍郎張璧詹
事陸深俸二級壬午定新一顯陵玄宮之域賜扈從文
武大臣金幣甲申享上帝于龍飛殿奉皇考配祭告皇

考于顯陵由左門入詣祔恩殿行三獻禮扈從及所在
鎮巡官各吉服陪拜上悲思瞻敬再製獻陵之歌丙戌
楚王顯榕來朝宴勞加祿如儀戊子以大享禮成御龍
飛殿受羣臣賀頒詔天下是日召承天父老子弟百餘
人見宣諭賜之酒食庚寅以迴鑾辭告獻皇帝后神位
于隆慶殿以扈從後期降翰林學士張治倬二級壬辰
發承天製思恩之賦超拜御史胡守中為右僉都御史
丁酉崇王載堦請朝于裕州上以迴鑾日迫免朝因賜

書徧諭諸王四月戊戌朔至鄭州伊王訐淳來朝宴勞
如儀癸卯奉上諭行在禮部純德山聖靈安悅流慶子
孫三處視地悉已之行宮道路止勿治戊申以御史謝
少南請入慶都堯母墓于祀典合旨陞左春坊左司直
兼翰林院檢討辛亥奪葉縣知縣李浦職為民以置扈
從官員公館令吏持牌道上迎候故也壬子還京師留
守大臣率文武百官俱吉服奉迎闕外不至者千一百
四十二人奪俸有差



弇山堂別集卷六十六

欽定四庫全書

史部

弇山堂別集卷六十八

詳校官編修_臣李漢

編修_臣裴謙覆勘

總校官中書_臣朱鈐

校對官中書_臣孫球

謄錄監生_臣沈方大

欽定四庫全書

弇山堂別集卷六十七

明 王世貞 撰

親王祿賜攷

會典載親王郡王王子王孫及公主郡主等每歲支撥
親王唐制歲該穀四千八百石絹四千八百疋綿四百
五十斤宋制領節度使歲該穀二千四百石錢四千八
百貫絹二百疋綾一百疋羅十疋綿五百兩今定米一

萬石郡王唐制歲該米七百石田六十頃宋制領觀察使歲該粟一千二百石錢二千四百貫絹二十疋綿五十兩今定米二千石鎮國將軍唐制歲該米六百石田五十頃宋制郡王子以下量材授官照其官品高下給祿今定米一千石輔國將軍唐制歲該米五百石田四十頃今定米八百石奉國將軍唐制歲該米四百石田二十五頃今定米六百石鎮國中尉唐制歲該米三百石田十四頃今定米四百石輔國中尉唐制歲該米二

百石田八頃今定米三百石奉國中尉唐制歲該米一
百石今定米二百石公主及駙馬食祿米二千石郡主
及儀賓食祿米八百石縣主及儀賓食祿米六百石郡
君及儀賓食祿米四百石縣君及儀賓食祿米三百石
鄉君及儀賓食祿米二百石皇太子次嫡子并庶子既
封郡王之後必俟出閣每歲撥賜與親王子已封郡王
者同女俟及嫁每歲撥賜與親王女已嫁者同郡王嫡
長子襲封郡王者其歲賜比初封郡王減半支給

各府祿米

秦府秦王歲支祿米一萬石米鈔中半兼支郡王初封
歲支祿米二千石本色五百石折色一千五百石襲封
一千石米鈔中半兼支鎮國將軍歲支祿米一千石輔
國將軍歲支祿米八百石奉國將軍歲支祿米六百石
鎮國中尉歲支祿米四百石俱米鈔中半兼支

晉府晉王歲支祿米一萬石郡王初封歲支祿米二千
石襲封一千石米鈔中半兼支鎮國將軍歲支祿米一

千石輔國將軍歲支祿米八百石奉國將軍歲支祿米
六百石鎮國中尉歲支祿米四百石俱米鈔中半兼支
周府周王歲支本色祿米二萬石襲封歲支本色祿米
一萬二千石郡王初封歲支祿米二千石襲封一千石
俱米鈔中半兼支鎮國將軍歲支祿米一千石輔國將
軍歲支祿米八百石奉國將軍歲支祿米六百石鎮國
中尉歲支祿米四百石俱米鈔中半兼支

楚府楚王歲支本色祿米一萬石郡王初封歲支祿米

二千石襲封一千石俱米鈔中半兼支鎮國將軍歲支
祿米一千石輔國將軍歲支祿米八百石奉國將軍歲
支祿米六百石鎮國中尉歲支祿米四百石輔國中尉
歲支祿米三百石俱米鈔中半兼支郡王初封歲支祿
米一萬石米鈔中半兼支郡王初封歲支祿米二千石
襲封一千石俱米鈔中半兼支鎮國將軍歲支祿米一
千石輔國將軍歲支祿米八百石奉國將軍歲支祿米
六百石俱米鈔中半兼支

蜀府蜀王歲支祿米一萬石郡王初封歲支祿米二千石襲封一千石俱米鈔中半兼支鎮國將軍歲支祿米八百石奉國將軍歲支祿米六百石俱米鈔中半兼支代府代王歲支祿米六千石米鈔俱中半兼支郡王初封歲支祿米二千石襲封一千石俱米鈔中半兼支鎮國將軍歲支祿米一千石輔國將軍歲支祿米八百石奉國將軍歲支祿米六百石俱米鈔中半兼支

肅府肅王歲支祿米一千石本色七百石折色三百石

郡王初封歲支祿米一千石米鈔中半兼支襲封同

遼府遼王歲支本色祿米二千石郡王初封歲支祿米二千石襲封一千石俱米鈔中半兼支鎮國將軍歲支祿米一千石輔國將軍歲支祿米八百石奉國將軍歲支祿米六百石鎮國中尉歲支祿米四百石輔國中尉歲支祿米三百石奉國中尉歲支祿米二百石俱米鈔中半兼支

慶府慶王歲支祿米一萬石本色七千五百石折色二

千五百石

正德五年革
祿米三之一

郡王初封歲支祿米一千石米

鈔中半兼支襲封同鎮國將軍歲支祿米一千石輔國將軍歲支祿米六百石俱米鈔中半兼支

寧府寧王歲支祿米一萬石米鈔中半兼支郡王初封歲支祿米一千石米鈔中半兼支襲封同鎮國將軍歲支祿米一千石輔國將軍歲支祿米八百石奉國將軍歲支祿米六百石俱米鈔中半兼支

岷府岷王歲支本色祿米一千五百石郡王初封歲支

祿米五百石米鈔中半兼支襲封同鎮國將軍歲支祿米一千石輔國將軍歲支祿米八百石俱米鈔中半兼支

韓府韓王歲支祿米三千石本色二千石折色一千石郡王初封歲支祿米一千石輔國將軍歲支祿米八百石奉國將軍歲支祿米六百石鎮國中尉歲支祿米四百石俱米鈔中半兼支

藩府藩王歲支祿米一萬石本色六千石折色四千石

郡王初封歲支祿米二千石襲封一千石俱米鈔中半
兼支鎮國將軍歲支祿米一千石輔國將軍歲支祿米
八百石奉國將軍歲支祿米六百石俱米鈔中半兼支
唐府唐王歲支本色祿米五千石郡王初封歲支祿米
二千石襲封一千石俱米鈔中半兼支鎮國將軍歲支
祿米一千石輔國將軍歲支祿米八百石奉國將軍歲
支祿米六百石俱米鈔中半兼支

伊府伊王歲支本色祿米二千石郡王初封歲支祿米

二千石襲封一千石俱米鈔中半兼支鎮國將軍歲支
祿米一千石米鈔中半兼支

趙府趙王歲支祿米一萬石襲封一千石俱米鈔中半
兼支郡王初封歲支祿米二千石襲封一千石米鈔中
半兼支鎮國將軍歲支祿米一千石輔國將軍歲支祿
米八百石俱米鈔中半兼支

鄭府鄭王歲支本色祿米一萬石郡王初封歲支祿米
二千石襲封一千石俱米鈔中半兼支

襄府襄王歲支本色祿米一萬石郡王初封歲支祿米
二千石襲封一千石俱米鈔中半兼支

荊府荊王歲支本色祿米一萬石郡王初封歲支祿米
二千石襲封一千石俱米鈔中半兼支鎮國將軍歲支
祿米一千石米鈔中半兼支

淮府淮王歲支祿米一萬石米鈔中半兼支郡王初封
歲支祿米一千石米鈔中半兼支襲封同

德府德王歲支本色祿米一萬石郡王歲支祿米二千

石米鈔中半兼支

秀府秀王歲支祿米一萬石

後國絕

崇府崇王歲支本色祿米一萬石郡王初封歲支祿米
二千石米鈔中半兼支

吉府吉王歲支本色祿米一萬石

徽府徽王歲支本色祿米一萬石郡王初封歲支祿米
二千石襲封一千石俱米鈔中半兼支

興府興王歲支本色祿米一萬石

岐府岐王歲支本色祿米一萬石

後國絕

益府益王歲支本色祿米一萬石

衡府衡王歲支本色祿米一萬石

雍府雍王歲支本色祿米一萬石

後國絕

壽府壽王歲支本色祿米一萬石

汝府汝王歲支本色祿米一萬石

涇府涇王歲支本色祿米一萬石

榮府榮王歲支本色祿米一萬石

靖江王府靖江王歲支本色祿米一千石輔國將軍歲支祿米八百石奉國將軍歲支祿米六百石鎮國中尉歲支祿米四百石輔國中尉歲支祿米三百石奉國中尉歲支祿米二百石俱米鈔中半兼支

按會典所引親王萬石項下云唐制歲該四千八百石絹四千八百疋綿四百五十斤宋制領節度使歲該穀二千四百石錢四千八百貫絹二百疋綾一百疋羅十疋綿五百兩郡王二千石下云唐制歲該米

七百石田六十頃宋制領觀察使歲該粟一千二百石錢二千四百貫絹二十疋綿五十兩於鎮國將軍一千石下云唐制歲該米六百石田五十頃宋制郡王子以下量材授官照其官品高下給祿其輔國將軍至奉國中尉俱引唐制為比不知當時修會典諸公何鹵莽不學至此唐親王正一品嗣王郡王國公從一品郡公正二品蓋言其班位與幹力防閣之類視之耳非為祿也何以言之凡王公必有邑封當武

德時公卿大夫皆以功起無不受封邑者以故不給祿秩至貞觀而始定京官正一品米七百石錢六千八百從一品米六百石正二品米五百石錢六千以至九品三十石外官降一等後又改公田十二頃至二頃其幹力及防閣庶僕別給今所謂親王穀絹錢數何據也郡王視從一品止應六百石不當言米七百石田六十頃也攷之太宗為秦王功大至三萬戶齊王元吉亦二萬而諸王少者千戶至中宗時相王

太平安樂公主各實封滿萬戶太府卿韋嗣立奏食
祿之家用六十萬丁一丁絹兩疋過於國家本數又
御史宋務光言太平安樂多割腎膏丁多者為民累
至開元初始定戶不過三丁親王封止千戶然則食
千戶者大約可得絹六千疋或為職官始有兼祿而
幹力防閤視品秩為定耳然食貨志又有親王公田
百頃郡王公田五十頃地當是食祿而戶則調絹其
郡王及郡王次子以下却無封爵或有恩澤特封或

量材擢用今擬引至中尉何所據也宋制皇子節度領侍中皇族節度平章事及節度錢穀絹綾羅數雖同而無穀石且親王初出閣止領觀察而郡王資久有轉至使相者殊不以親郡王為等也其下明載領節度留後者歲錢千六百貫加絹五十疋綾十疋春羅一匹冬綿百兩領觀察者錢千貫絹三十疋綾羅同綿五十兩以下又有領防禦團練六軍統軍諸衛上將軍名項而其封亦有國公郡侯郡伯之名今謂

郡王之子即量材授官抑何舛也蓋唐制王公以食邑為準而有官則有祿宋制食邑真食皆為虛而以兼官制祿與本朝之制異不可強而引也

洪武九年定諸王公主歲供之數

親王歲支米五萬石鈔二萬五千貫錦四十疋紵絲三百疋紗羅各一百疋絹五百疋冬夏布各一千疋綿二千兩鹽二千引茶一千斤馬匹草料月支五十匹其段足歲給匹料付王府自造

靖江王歲支米二萬石鈔一萬貫餘物比親王減半馬
匹草料月支二十匹

公主未受封每歲支紵絲紗羅各一十疋絹冬夏布各
三十疋綿二百兩已封賜莊田一所計歲收米一千五
百石鈔二千貫

親王子男未受封歲支紵絲紗羅絹冬夏布綿同公主
未封例女未封者減半

男已封郡王者歲支米六千石鈔二千八百貫錦一十

疋紵絲五十疋羅二十五疋絹及冬夏布各一百疋綿
五百兩鹽五十引茶三百斤馬匹草料每月支十匹女
已受封及已嫁者歲支米一千石鈔一千四百貫段絹
於所在親王國帶造

皇太子次子既封郡王後候出閣歲支與郡王同女及
嫁者與郡王已封女同

按是時親藩既少而物力方茂故所定如此及查會
典所載周王二萬石襲封萬二千石秦晉楚蜀慶魯

寧藩趙鄭襄荆淮德秀崇吉徽興岐益衡雍壽汝涇
榮王各一萬石代王六千石唐王五千石遼韓伊王
二千石岷王千五百石肅王一千石與前迥異豈非
憲宗支蕃衍為式貢之地耶然中間差等不一如岷
王之千五百石肅王之一千石反不如他府之初封
郡王尚有二千石而岷府之郡王五百石更不若本
府之鎮國尚有一千其他如代府之六千唐府之五
千韓府之三千遼府之二千或係轉餉之難或係暫

作行糧俱不可曉也又惟周王本色二萬石或係太宗母弟之故至其子孫尚存萬二千則秦晉二王獨非太宗之母兄乎

永樂二十二年仁宗謂戶部尚書夏原吉曰朕諸叔在者無幾諸兄弟惟趙王居京師餘皆守藩于外朕旦夕在念蓋帝王之治莫先親親况朕親嗣大位於此尤當加意其增諸王歲祿于是周府加米五千石通前二萬石悉支本色慶府原祿一萬石悉支本色寧府加米九

千石通前一萬石悉支本色代府加米千五百石通前
二千石悉支本色潘府加米七千石通前萬石內本色
米六千石餘折鈔唐府加米千七百石通前二千石悉
支本色魯府加米二千石通前五千石悉支本色遼府
加米千石通前二千石悉支本色肅府加米五百石通
前一千石悉支本色秦府原祿一萬石內加米四千五
百石通前五千石支本色餘五千石折鈔伊府加米千
七百石通前二千石悉支本色靖江王加米七百石通

前一千石悉支本色漢趙二府各加米二萬石通前三萬石仍歲加鈔十萬貫晉濟熈給米三千石明年又命戶部給韓王冲煖歲祿米三千石內一千五百石支本色餘折鈔襄陵王樂平王各歲祿一千石內五百石支本色餘折鈔致漢庶人以宣德元年反削國而趙王亦辭所加之祿矣

嘉靖九年禮部覆豐林王疏議處宗室事上自為書賜諸王欲將朝廷皇子皆封郡王親王次子皆封鎮國將

軍書成未發以示少傅張璉璉言諸王封爵原有定制恐一旦減降有失親睦之道以臣愚計莫若量減祿而不降封郡王以下凡全支俸米者照依京官事例米鈔或四六或中半折支其有米鈔兼支者亦量為遞減以示撙節上遂不果行至嘉靖末禮部議上宗藩條例於是秦晉周楚蜀趙慶襄淮德崇歲祿萬石辭一千石魯益衡歲祿萬石辭二千石榮王萬三百石與唐王五千五百石俱辭五百石而郡王以下至中尉皆有所減削

矣

元之諸王歲祿尤與歷代異蓋皆領部曲逐水草於西北邊而國家以金帛絲楮之類供之其厚薄有絕不可

曉者太祖叔達爾扎官人位歲銀三十錠

錠五
十兩

段一百

疋五戶絲一千八百一十二斤江南戶鈔四百四十錠

弟綽爾濟康薩爾大王子淄川王位歲銀一百錠段三

百疋五戶絲三千六百五十六斤江南戶鈔一千二百

錠噶濟袞大王子濟南王位歲銀一百錠綿六百二十

五斤小銀色絲五千斤段三百疋羊皮一千張絲九千六百四十八斤鈔二千六百錠額哲諾延位歲銀一百錠絹五千九十八疋綿五千九十八斤段三百疋羊皮五百張金十六錠四十五兩絲一萬一千四百二十五斤鈔二千八百五十五錠伯勒格岱大王子廣寧王位歲銀一百錠段三百疋絲一千三百五十九斤鈔七百二十錠太祖長子穆爾齊大王位歲段三百疋常課段千足絲一萬斤戶鈔二千四百錠次子察噶岱大王歲銀一

百錠段三百足綿六百二十五斤常課金六錠六兩絲
六千八百三十八斤鈔二千六百九十三錠第三子太
宗子定宗位歲銀一十六錠三十三兩段五十足絲五
千一百九十三斤第四子睿宗子額呼布格大王位歲
銀一百錠段三百足絲一千五十三斤鈔四千一百六
十錠第六子科爾戩太子河間王位歲銀一百錠段三
百足絲四千四百七十九斤鈔一千一百五十七錠太
宗子哈丹大王位歲銀十六錠三十三兩段五十足絲

九百三十六斤鈔一百錠摩哩大王銀段同絲九百九十七斤合失大王銀段同絲一百五十四斤庫楚太子銀六十六錠三十三兩段一百五十足絲七百六十四斤鈔一千一百九錠睿宗長憲宗子阿固台大王歲銀八十二錠段三百足絲九百十六斤次子世祖子裕宗位歲銀五十錠鈔一千一百九十錠后位段一千足絹一千足鈔四千五百三十錠睿宗子實喇大王歲銀一百錠段三百足絲二千二百一斤摩格大王歲銀五十

錠段三百足絲三百三十三斤鈔三百二十四錠博綽
大王歲銀段同絲六百十斤鈔二百十三錠蘇克圖大
王絲二十斤世祖子安西王莽噶拉木歲段一千足絹
一千足鈔二千六百錠北平王諾木歡同平遠王庫庫
楚歲折段足物料鈔一千六百五十六錠折銀鈔一千
錠戶鈔五百四十四錠西平王鄂囉齊阿雅噶齊大王
鎮南王托歡雲南王和克齊呼圖克特穆爾太子歲折
段足物料銀鈔戶鈔俱同裕宗長子晉王噶瑪拉歲段

一千足絹一千足中統鈔一千錠戶鈔二千六百錠順宗子阿珠格爾魏王又武宗子明宗歲鈔各二千六百錠此外有哈丹大王絲七十七斤和囉奇大王絲三十七斤阿哩袞徹爾大王僅二斤而已

宗室公主即位之賞

成祖初周楚齊代等國并靖江王各黃金百兩白金千兩綵幣四十足錦十足紗羅各二十足鈔五千錠仁宗初漢王高煦趙王高燧各黃金五百兩白金五千

兩錦百疋紵絲二百疋羅二百疋紗二百疋胡椒蘇木
各五千斤鈔萬錠良馬百匹以同母弟故也周王橐黃
金百兩白金千兩紵絲四十表裏錦十疋紗羅各二十
疋鈔萬錠慶王橐寧王權代王桂藩王模無黃金其白
金鈔錠錦帛等物同周王唐王瓊煙魯王肇輝晉王濟
煥蜀世孫友瑱平陽王美圭各白金五百兩鈔六千錠
紵絲二十表裏錦六疋羅十疋紗十疋晉庶人濟熈翼
善冠二金相玳瑁帶龍文紵絲紗羅衣材九龍白金三

百兩鈔六千錠紵絲羅各二十表裏錦九疋紗二十疋
胡椒蘇木各三千斤殿馬二十四匹寧國長公主白金五
百兩鈔五千錠紵絲二十表裏錦六疋羅紗各十疋汝
寧懷慶南康永嘉含山汝陽寶慶七長公主各白金三
百兩鈔六千錠紵絲二十表裏

宣宗初賜周寧慶代藩五王各白金五百兩紵絲二十
表裏錦五疋紗羅各二十疋兗羅錦五疋西洋布十疋
鈔三萬貫漢趙二王加黃金百兩餘同其晉楚遼肅魯

韓唐伊蜀秦十王各白金三百兩紵絲十表裏錦三疋
紗羅各十疋兜羅錦三疋西洋布五疋鈔二萬貫寧國
大名南康永嘉含山汝陽寶慶七大長公主及永平安
寧咸寧三公主各白金二百兩鈔萬貫餘同十王

英宗初賜慶代寧岷四王各白金五百兩紵絲羅各二
十表裏紗二十疋錦五疋鈔三萬貫周楚魯遼韓五王
各白金三百兩紵絲羅各十五表裏紗十五疋錦三疋
鈔二萬貫肅唐伊瀋襄荊淮梁趙秦及平陽保寧二王

各白金三百兩紵絲羅各十表裏紗十疋錦三疋鈔二萬貫靖江王白金二百兩紵絲羅各十表裏紗十疋錦三疋鈔萬貫汝陽含山永嘉南康四大長公主咸寧長公主安成公主各鈔二萬貫餘同靖江王

景帝初賜曾叔祖岷王白金三百兩紵絲羅十表裏紗十疋錦五疋鈔萬貫諸王各白金二百兩餘同公主以下賞有差

憲宗初賜魯王遼王慶王肅王唐王鄭王襄王寧王周

王藩王伊王岷世子各白金三百兩紵絲羅各十五表裏紗十五疋錦三疋鈔二萬貫淮王晉王秦王韓王代蜀二世子各白金三百兩紵絲羅十表裏紗十疋錦三疋鈔二萬貫趙悼王荆靖王長子靖江王各白金二百兩紵絲羅十表裏紗十疋錦三疋鈔一萬貫

孝廟初賜寧王唐王藩王慶王周王襄王鄭王岷王肅王遼王蜀王楚王晉王淮王代王伊王魯王各白金三百兩紵絲羅十五表裏紗十五疋錦三疋鈔二萬貫德

王崇王吉王徽王荆王趙王韓王鎮安王各白金三百兩紵絲羅十表裏紗十足錦三足鈔二萬貫靖江王白金二百兩紵絲羅十表裏紗十足錦三足鈔一萬貫

武廟初賜親王白金文綺各有差武廟以後史略其數不可攷大抵宣德初賞已薄於仁廟自是而後差次減削益懸絕矣攷之漢史惟呂太后崩遺詔賜諸王各千金其後人主加元服賜諸王黃金皆百斤而即位之賜不可攷也惟元自成宗即位大會諸王比世祖應賜黃金五

十兩者增至二百五十兩銀五十兩者增至三百五十兩鈔幣各有差武宗即位賜如之仁宗即位普賜諸王金凡三萬九千六百五十兩銀一百八十四萬九千五十兩鈔二十二萬三千二百七十九錠幣帛四十七萬二千四十八疋英宗即位普賜諸王金五千兩銀七十八萬兩鈔幣五萬七千三百六十四疋木棉九萬二千六百七十四斤衣八百九十五襲泰定帝即位普賜后妃諸王金三萬五千餘兩銀二百六十五萬兩錢鈔幣

帛稱是其視我朝不啻數十倍矣

之國之賞

之國之賞可攷者洪武十

閱

年楚王楨之國武昌賜黃

金千六百兩白金二萬兩鈔二萬錠永樂元年汝南王
有勲之國雲南鈔二萬錠海巴十萬索綿布五百疋寧
王權之國南昌鈔萬錠又賜萬錠周王橚之國大梁鈔
萬錠又以朝辭賜鈔二萬錠紵絲三百疋紗羅各百疋
絹千疋堯羅錦五十二條火者二十八人馬百匹谷王

穗之國長沙賜馬二十四匹金鞍一副銀五百兩鈔三萬六千錠錦十足紵絲綾羅各六十疋絹百九十疋羊二十羖酒二百餅衣紗羅絹布各五十疋鈔萬錠

洪熙元年趙王高燧之國彰德賜黃金一百兩白金五百兩綵幣九十表裏鈔二萬錠馬十匹金鞍一副

來朝之賞

來朝之賞可攷者洪武三十五年即文廟初賜楚王楨鈔二萬五千錠綵幣二十表裏代王桂鈔七千錠晉王

濟煇五千錠元年賜永興王尚烈鈔千八百錠平陽王
濟煇八千錠周世子有燉鈔二千錠二年賜周王橐鈔
萬錠又追賜羊百牽酒千瓶及外國貢物九年賜谷王
穗白金千兩鈔三萬錠紵絲百疋袞龍袍服三襲絹五
百疋白毳羅錦十條西洋布三十疋檀香三百斤降真
香五百斤胡椒蘇木各千斤馬十匹羊百羖酒五百餅
椰子三百枚火者百人十四年賜周王橐鈔二萬錠紵
絲五百疋紗羅各百疋絹千疋毳羅錦五十二條火者

二十八人馬百匹楚王楨馬百匹鞍轡一副鈔三萬錠
紵絲三百疋紗羅各百疋絹千疋胡椒千斤椰子千箇
紅白堯羅錦五十二條及紅撒哈刺獅子尾等物蜀王
椿銀三千兩鈔六萬錠米萬石各色紵絲五百疋紗羅
各二百五十疋絹千疋堯羅錦六十條蘇木五千斤胡
椒三千斤馬一百匹鞍二副火者百人肅王模紵絲
五十疋紗羅各三十疋絹三百疋洪熙元年賜漢王子
瞻坦臨淄王瞻域昌樂王瞻埤淄川王瞻瑋賜瞻坦織

金紵絲羅紗衣各三襲文幣二十表裏黃金百兩白金
五百兩馬十匹瞻域等織金紵絲羅紗衣各二襲文幣
十六表裏黃金八十兩白金四百兩馬八匹靖江王府
輔國將軍贊侃贊偕各鈔二十萬貫蓋是時鈔已賤故
也高成之世諸王來朝歲無虛月不聞以煩費疑禍為
嫌自仁廟辭周王以下入臨而宣廟後遂絕矣惟天順
中袁邸兩朝尺順中太皇太后疾亟召諸王甫命下而
駕崩竟罷之

特賜可攷者永樂元年賜周王橚鈔八萬錠齊王榑二萬錠四年後賜周王鈔六萬錠楚王楨二萬錠蜀王椿珍珠一百九十二兩白金一千五百兩鈔二萬錠谷王穗紗羅絹布各五十疋慶王橈各三十疋鈔各二萬錠慶成王濟炫織金袞龍紵絲袍服十八表裏各色紵絲一百表裏撒哈刺二匹兜羅錦被十金相柳蓋一鈔五萬錠洪熙元年賜寧王權黃金百兩白金三百兩錦十足綵段二十表裏紗羅各十疋周王橚白金綵幣同鈔

二萬貫晉王濟煔白金百兩鈔十萬貫綵幣六十表裏
火者六十什器香藥咸備

特賜公主可考者賜寧國長公主洪武三十五年賀生

辰禮物銀四錠

每錠重五十兩

彩段十表裏鈔四百錠羊二十

羶酒一百瓶果四盒

永樂二年賜特製鳳冠一頂

永樂八年賜花銀六百兩米五百石鈔六萬貫紵絲五

十足暗花二十六疋大紅三疋福青五疋藍青三疋黑

綠五疋深桃紅二疋素二十四疋大紅四疋深青四疋
肉紅三疋翠藍四疋明綠五疋出爐銀紅四疋綵絹二
百疋大紅二十五疋桃紅五十疋木紅五十疋藍二十
五疋綠五十疋羊一百羴酒五百瓶柴三萬斤炭一萬
斤閹者拾名范春年二十歲阮道年二十歲武士年二
十歲范極年十八歲阮擬年十七歲阮注年十六歲武
合年十六歲阮倫年十六歲陳旗年十五歲良舍年十
二歲

永樂十三年賜鍍金銅佛像二尊文殊菩薩一尊四臂
觀音菩薩一尊鍍金銅鈴杵六副紅字輪六十個大紅
明花紵絲袋金纍漆紅刻菊花香盒一個金字輪三個
共一袋盛金匾索計一兩四錢金廂佛骨一塊嵌用紅
寶石六塊金匾索共計金二兩三錢金廂紫檀木數珠
一串計一百一十顆上帶金小杵一個共計金一兩八
錢臘羊二十隻臘猪十口計三簍蛤蜊醬一百六十斤
計四罈醃蛭九十斤計四罈醃魚子八十斤計四罈水

母線四十斤計二罈醃蠣肉三十三斤計二罈醬蚶子
六十個計二罈對蝦五百對計一簍蝦米一百斤計二
簍海魚一千斤計十二簍松子三石計三櫃榛子三石
計三櫃核桃二萬個計二簍紅棗兒二石計二簍酥油
一百斤計二桶泥螺六十斤計二罈各色羅十表裏各
色紗一十疋各色將樂布十疋高麗布五疋縐絲布五
疋鈔二萬貫米三百石

永樂十三年賜鈔五萬貫兜羅綿十牀海外番鹽三塊

計三十斤

永樂十四年賜銀二十錠每錠五十兩鈔五萬貫胡椒一千斤羊一百羴米一千石柴五萬斤炭五千斤

永樂十五年賜鈔五萬貫綵段三十疋綵絹三十疋黃鼠一千個酥油一百斤榛子十石紅棗五石栗子十石核桃一萬個

永樂二十年賜大吉祥妙輪十一個紅漆一個黑漆十個

永樂二十二年賜銀五百兩鈔三萬貫紵絲二十表裏
錦六疋羅十疋紗十疋

生日之賞可攷者永樂二年賜周王櫛布五十疋縠絲
將樂布各百疋日本扇二百握四年賜金袞龍紗三疋
織金鸞鳳鞠衣材二疋素暗花紗十三疋高麗布二十
疋縠絲布十疋又賜紵絲紗羅各二十疋綵絹四十疋
鈔萬錠馬十匹及羅帕金扇等物九年肅王拱來朝是
日適拱生日賜綵幣十表裏羊五十羖酒百餅仍命光

祿供饔飧

按古之恩賜可攷者漢昭帝初賜燕王旦廣陵王胥錢一千萬廣陵王來朝賜錢二千萬黃金二百斤劍二安車一乘馬二駟宣帝賜黃金前後五千斤他器物甚衆東平王蒼歸國明帝賜錢五十萬布十萬疋七年特賜宮人奴婢五百人布二十五萬疋及珍寶服御器物十五年賜錢千五百萬布四萬疋章帝建初元年以言事賜錢五百萬又賜大宛汗血馬一匹

入朝賜裝錢千五百萬又賜貂裘及大官食物珍果
臨訣賜乘輿服御珍寶輿馬錢布以億萬計薨賜賻
錢一萬萬布九萬足阜陵王延徙都壽春賜錢千萬
布萬足安車一乘清河王慶誅竇憲後賜奴婢三百
人輿馬錢帛帷帳珍寶玩好充牣無筭宋初賜秦王
廷美銀萬兩德昭德芳各五千兩出秦王廷美西京
賜襲衣通犀帶錢千萬緡絹綵各萬疋銀萬兩甲第
一區周王元儼疾賜銀五千兩皇子愷封魏王賜黃

金三千兩白金一萬兩金世宗賜壽王呼圖金一百
五十兩金綵百端絹五百疋章宗立各賜金五百兩
銀五千兩錢十萬金幣三百端絹二千疋元憲宗賜
諸王巴圖銀一千錠鈔五十萬貫元世祖賜諸王穆
格銀二千五百兩諸王阿齊台和拉呼喇哈丹呼喇
珠寶訥格爾烏爾固岱昭圖卜穆爾阿濟格各五千
兩文綺帛各三百疋塔察阿穆爾鈔各五十九錠綿
五千九十八斤絹五千九十八疋文綺三百疋海都

銀八百三十三兩文綺五十疋北平王諾木歡馬萬
三千匹羊五萬又馬三萬羊十萬諸王阿濟格米五
千石馬六百羊萬口諸王旺多銀千兩和尼齊五百
兩各珠一索錦衣一襲諸王茂巴爾銀五萬兩幣帛
各一萬疋烏爾圖扎濟固爾銀五千兩幣帛各一百
足諸王錫錫金百兩銀萬兩鈔千錠齊奇金二百兩
銀二萬二千五百兩鈔九千錠及紗羅絹布各有差
本巴金百兩銀萬兩金素段五百紗羅絹布四千五

百疋巴圖布拉克金百五十兩銀五十兩幣帛紗羅萬
疋瑪爾布金銀各二百五十兩幣帛紗羅萬疋伊爾根
金五千兩銀五千兩鈔千錠幣帛紗羅二千疋阿勒
達爾圖等金千二百五十兩銀十二萬五千兩鈔二
萬五千錠幣帛布毛二萬三千六百六疋阿雅噶
齊等金千兩銀一萬八千三百六十兩絲萬兩綿八萬
三千二百兩金素幣一千二百疋絹五千九十八疋部
曲羊馬鈔二十九萬餘錠馬二萬六千九百一十四羊

十萬二百一十駝八牛九百武宗賜幽王徹伯爾金
千五百兩銀二萬兩鈔萬錠庫舍布克等金二千三
百兩銀一萬七百兩鈔三萬九千一百錠蒙郭勒除
登極恩賜外金五百兩銀千兩鈔二千錠鎮南薩喇
章又親王班布爾寶金五百兩銀五千兩鈔二千錠
定王伊瑪和爾金千五百兩銀三萬兩鈔萬錠高唐
王專金五千兩銀五萬兩又諸王南達薩雅鈔二百
五十萬貫文宗賜諸王阿喇特納實哩裕魯特穆爾

知樞密院事布哈特穆爾金各五百兩銀各二千五百兩鈔各萬錠西域諸王揚珠台吉金二千五百兩銀萬五千兩順帝賜親王薩茂達實金百兩銀千兩鈔萬錠綺帛表裏各三百足成王賜伊克都護金五百五十兩銀七千五百兩哈瑪爾沁特穆爾金五十兩銀四百五十兩定西王鄂魯齊寧遠王庫克齊鎮南王托歡額森特穆爾等金各五百兩銀五千兩鈔二千錠幣帛各二百足特穆爾布哈伊扎爾布哈等金各四百

兩銀四千兩鈔一千六百錠幣帛各一百六十疋安
西王阿南達鈔二十萬錠寧遠王庫克齊六萬錠諸
王阿濟格二十萬錠漢與元之賜宗室如此其去我
朝何啻十倍也

有功之賞

有功之賞可攷者洪武二十年賜楚王楨秦馬二十匹
黃牛二千頭牂牛一千頭羊九千隻并陝西草場一處
以征雲南阿魯圖等處功也又賜晉王櫚及燕王諱鈔

各一百萬錠以征迤北功也洪武三十五年賜谷王穗樂七奏衛士三百金銀槍大劍金三百兩銀三千兩綵幣三百疋鈔三萬錠馬四匹金籠鞍轡二副歲加祿米三千石以金川門功也永樂十四年賜蜀王椿黃金二百兩白金千兩鈔四萬錠玉帶一金織袞龍紵絲紗羅衣九襲紵絲綾羅紗各五十疋絨錦十疋綵絹千疋毳羅錦十條高麗布百疋米千石胡椒千斤馬十匹金鞍轡二副以發谷府反謀功也二十二年賜趙王高燧白

金三千兩鈔三萬貫綵幣二百表裏馬十匹以護送山陵勞也

弇山堂別集卷六十七